





Al sune la ghitare Stiefin.  
Al dispense felicitât. Al prodûs droghe legâl. Al invente cjançons.  
Il mio çurviel al è colegât.  
La mê ment e je in sintonie cui siei suns.  
La mê ment si insumie.  
O soi in orbite intor de Lune. Cumò.  
O viôt il tramont a riis zalis disore de culine dal cjascjel. Cumò.  
O voi ator par chê strade di militârs in montagne cun chei suns di tastiere siderâl...  
Cumò.  
Avost di tancj agns fa. Cîl blu e la musiche di *Moonloop* e veve ancjemò di vignî ma jo za le spietavi. O spietavi la ghitare floydiane di Stiefin.  
O spietavi i suns de primevere.  
I miei lavris a son colôr cinise.  
Lis palpieris si sierin. Mi insumii.  
Ancjemò.  
I luncs cjavei di Stiefin a svoletin. La int si môf. Un cjocat al berle "Pink Floyd Pink Floyd!"  
Lis lampadinis blu si piin. Une more riçote e je in prime rie, dute cjapade. Stiefin, ocjâi scûrs e discolç, al dopre la ghitare come se e fos une estension dal so cuarp.  
O sin tal 2001 Xò. Migo tal 1970...  
E pûr...  
I suns eletronics di *subfundus* a somein chei dai Tangerine Dream.  
No ai dibisugne di stâ a fevelâ di monadis tal mieç dal fum cun altre int...  
Stiefin e la sô ghitare che e gnangole a pensin ancje par me.  
Il mio cuarp al è poiât dongje dal arbul dal riç...

**di Checo Tam**

**#918**